

NJU TPÉMI YI DAN:ÊMBUM

Chóó Lémi ngê tpile yintóm:u u ngw:o lâm:o too

Mwiyémwiyé dini ghi ngê tpile dêpwo ya. Chóó Lémi ngê tpile yintóm:u lâm:o ngê. Ala dpodo wéni knî yi lâm:o too.

Ala Chóó Lémi u mwiyémwiyé dpodo. Chóó Lémi ngê mbóó lâm:o ngê. Apê, D:ââ kââdî taa dniye. Yed:oo yinté. Apê, Pudu taa dniye. Yed:oo yinté. Apê, Mbóó p:uu dny:oo kwo, mgîdî u l:êê dîy:o. Yed:oo yinté. Yi tpile yintóm:u mb:aamb:aa ngê lâm:o too.

Ala Chóó Lémi u dpodo myom:on:i. Chóó Lémi ngê dyámê pê lâm:o ngê. Mb:aamb:aa ngê lâm:o ngê.

Ala Chóó Lémi u dpodo pyâlon:i. Chóó Lémi ngê ntii mwada y:i núwo, dyámê a kmîng:o. Ntii mbwaa chámê doo. Yi dpodo pyile knî, Chóó Lémi ngê tpile yintóm:u yi ya tédê dm:i lâm:o too.

Ala Chóó Lémi u dpodo pâdon:i. Chóó Lémi ngê apê, Kpî yi pii we, apê, dyêêdî daa ngmidi. Yed:oo yinté. Apê, Nté woo pii we, apê, dyêêdî daa ngmidi. Yed:oo yinté. Yi tpile yilî yintóm:u mb:aamb:aa ngê lâm:o too.

Ala Chóó Lémi u dpodo lim:on:i. Chóó Lémi ngê apê, Te taa we, dyêêdî daa ngmidi. Yed:oo yinté. Nt:ee a m:ii, myénté mbwaa paa a m:ii. Apê, Nm:ê taa we, dyêêdî daa ngmidi. Yed:oo yinté, mbóó p:uu a m:ii. Apê, Tpile tp:oo taa we, dyêêdî daa ngmidi. Yed:oo yinté, têpê

mbêm:ê a m:ii. Apê, Yi nté ka tóó, apê, wun:ê kîn:i
lâm:o ngê. Chóó Lémi ngê yi tpile yintóm:u mb:aamb:aa
ngê lâm:o too.

Ala Chóó Lémi u dpodo w:ân:on:i. Chóó Lémi ngê apê,
Yoo n:aa lâm:olâm:o, yed:oo pyââ mâ lâm:o doo. Yi gha
dê, myénté yi n:uw:o dê mb:aamb:aa ngê lâm:o doo. Chóó
Lémi ntee doo ya, yinté lâm:o doo. Yepê, Dyámê pê
mb:aamb:aa ngê choo y:en:ê. Yepê, Te, ún:ê, tpile tp:oo
yilî dpo d:a kê té, yepê, ye mb:aamb:aa ngê choo vwuwo.
Apê, Tpile yilî n:ii dí lâm:o té, apê, mb:aamb:aa dé.

Yi dpodo pyile knî, Chóó Lémi ngê lâm:o too, tpile
n:ii a kaakaa nyédi. U dpodo yintóm:u wéni, yed:oo
machedê ngê pyodo. U kuwó dini ghi ngê tpile kam daa
m:u lâm:o ngê. U l:êê díy:o apê, Wo wéni, dpodo wo,
ngmên:ê piin:i u m:o. Apê, U m:om:u wéni, apê, ghê vyîmê
wo, apê, lîm:e wo. Wu u dí.

Chóó Lémi ngê pi u ngw:o lâm:o ngê

Chóó Lémi ngê têpê a ngêêdí, mâ u ngw:o lâm:o ngê.
Dini ghi n:ii ngê lâm:o ngê, ghê dêpwo ya. Chóó Lémi
ngê nupu dê yi wêê doo, ghê u ngw:o m:i kele. Chóó
Lémi ngê u pi nt:âng:â, apê, Adam.

Chóó Lémi ngê my:âng:o ndîi ngmê yó, u pi Eden. Nmî
kîghê a ngêêdí, y:i yó. Yi my:âng:o vy:o Chóó Lémi ngê
nté kn:ââ yilî kââ. Yi yin:i knî yi vy:o u m:om:u yin:i
miyó dpîm:o kwo, won:i u pi, Pi daa pê pwopwo, won:i u
pi Yâpwo. Chóó Lémi ngê Adam ka kwo, My:âng:o
mb:aamb:aa ngê chi y:en:ê. Kwo, Kêdangê tpyêpwi. Kwo,
Kî my:âng:o vy:o yi kîgha yilî dpî m:a ng:i, kwo,
ngmên:ê mu ngmîdi kidingê m:a. Kwo, Yâpwo. Kwo, Yi
yin:i wany:i m:a, kwo, Nyóó wany:i vyi, Ala kópu
mb:aamb:aa, ala kópu dono. Kwo, Dono mb:aamb:aa nyóó

wany:i chámê dê. Kwo, Miyó dê lama adpî ya, dono mb:aamb:aa. Kwo, Wu yin:i kîgha n:angmê m:a. Kwo, Wany:i m:a, kwo, wany:i pw:onu.

U kuwó dini ghi ngê Chóó Lémi ngê apê, Adam u m:o ka tóó. Apê, Doo u ntââ. Apê, U pyipe n:aa lâm:olâm:o. Apê, Yin:i wadí ngêêpî. U l:êê díy:o Chóó Lémi ngê tpile tp:oo yilî lâm:o ngê, têpê ngê, nmê:ê yilî my:e lâm:o ngê. Chóó Lémi ngê a n:uw:o too, nmî kîghê ka. Nmî kîghê ngê yi pi doo ntapê dé, Chóó Lémi ka kwo, N:an:a ntee pin:i yi vy:o daa kwo. Wod:oo Chóó Lémi ngê apê, Adam ntee pin:i yin:ê lâm:olâm:o. Chóó Lémi ngê nmî kîghê ngiy:a ngê. Dini ghi n:ii ngê doo dpî, Chóó Lémi ngê Adam u podo ngm:a a yong:o. Yi podo a ngêêdî, pyââ u ngw:o lâm:o ngê, kwo, Ny:i Adam u kpâm. U l:êê díy:o, dini ghi n:ii ngê pyââ mâ dpî yéé knî, pyââ ngê u pye m:î dpo kuwo dê, u moo k:ii ngmidi ngê dpî pyaa knî. Nee nt:u daa ntee tpile ngê dpî pyaa knî. Dini ghi n:ii ngê nmî kîghê ngê yi pyópu módu, kwo, Ny:i a pee. Kwo, Ny:i nê ntee pin:i. Chóó Lémi ngê yepê, Tp:ee ngmodo tpyé nyoo, yepê, kî tpile yintóm:u choo y:en:ê. Kn:ââ mbwi dpîm:o ya, dêdpîm:o myw:en:emyw:en:e. Adam ngê u kpâm u pi nt:âng:o, apê, Ivi.

Dono kn:ââ chap

Mw:ee u n:uw:o ndîî ngê doo ya. Mw:ee nmî kêpyââ ka póó wo, kwo, Mumdoo? Kwo, Chóó Lémi ngê ala kópu mumdoo dpo vyu, My:âng:o vy:o yi kîgha kudungmê m:a ngmê? Nmî kêpyââ ngê kwo, Yi kîgha n:ii a t:a té, kwo, u ntââ wany:i m:a té. Kwo, Ngmên:ê yi mu ngmidi yâpwo. Kwo, Yi yin:i kîgha wany:i m:a, kwo, wany:i pw:oo knî. Mw:ee ngê kwo, Kêle. Kwo, Yinté daa tóó. Kwo, Daa dpî pw:oo knî. Kwo, Dono mb:aamb:aa dpî lama adî ya, kwo, Chóó Lémi ntee pin:i ngê wadpî pyaa knî. Yi dini ghi ngê nmî kêpyââ ngê u yi u ngw:o doo kwo, Dono

mb:aamb:aa a chóó n:î chámê dê. Yed:oo yi kîgha a ngópu, ndîî. Myénté u moo ka n:êê ngmê yong:o. U moo ngê kwulo a ngópu, my:e ndîî. U kuwó dini ghi ngê yi lama yaa wo, apê, Tpile ny:i paa daa t:a. Yi dini ghi ngê myw:en:emyw:en:e ndîî ngê ye pyodo. U kuwó dini ghi ngê nmî kîghê cha y:oo yi yââ knî yi paa ngmê t:êê ngópu, m:u kópu dîy:o myw:en:e ye ghê wo.

Ntóm:okwodo dini ghi ngê Chóó Lémi my:âng:o vy:o doo n:aa paambwi. Dini ghi n:ii ngê nmî kîghê cha y:oo Chóó Lémi u paa u dny:e ny:ee ngópu, wod:oo mbêpê knopwo, chii mên:ê t:iy:e knopwo, y:i m:î mbwolo knopwo. Chóó Lémi nmî kîghê ka a kaa wo, kwo, Adam. Kwo, Ló y:i ny:in:ê kwo? Nmî kîghê ngê Chóó Lémi ka kwo, Maa u dny:e kîdî ny:oo, kwo, A ghê da kee, kwo, angénté wany:i m:uu n:ê, kwo, tpile a paa daa t:a, kwo, u l:êê dîy:o dî mbwâlî. Chóó Lémi Adam ka póó wo, kwo, N:uu ngê nga dê vyi, Tpile maa ngmê téni? . Kwo, Mumdo, kwo, a dny:e chuu ny:âng:o? Kwo, Yâpwo yi kîgha chi m:a? Nmî kîghê ngê kwo, Ny:i kn:ââ. Kwo, Pyópun:i a ka ny:in:ê kpo, kwo, yi pyópu ngê yâpwo yi kîgha a ka kêda kê, kwo, kîdî m:a. Chóó Lémi nmî kêpyââ ka póó wo, kwo, Kî yin:i kîgha lukwe dîy:o chi m:a? Nmî kêpyââ ngê kwo, D:aa kn:ââ. Kwo, Mw:ee yi kn:ââ. Kwo, Yin:ê dê dóó n:ê, kwo, yi kîgha kîdî m:a. Chóó Lémi ngê mw:ee ka kwo, Yi kópu u l:êê dîy:o, kwo, ngêê kpâlî daa n:ê kaa té, kwo, nyodo ngê wany:i paa, têpê mbêm:ê. Kwo, Dye ghi yintóm:u pi knî yi k:ii noko anmy:e diya.

Chóó Lémi ngê nmî kêpyââ ka kwo, Ny:i kn:ââ. Kwo, Dini ghi n:ii ngê any:uu tpámî, kwo, wiwi ndîî any:um:o pyw:oo. Kwo, Ngmên:ê moo u yi ngê amêdê kwo, kwo, u kwo am:ii ng:aa. Kwo, Yin:ê amêdê y:en:ê ng:i.

Chóó Lémi ngê nmî kîghê ka kwo, Ny:i kn:ââ. Kwo, Dpodombiy:e wany:i dpodo, yâpwo têdê. Kwo, Dpodo ndîi n:i:i a pyede, kwo, wany:i dódó dé, kwo, pwopwo any:i wun:ê tóó. Chóó Lémi ngê nmî kîghê ka kwo, Têpê ngê n:î lâm:o nyoo, kwo, any:uu pw:onu, kwo, têpê ngê am:i:i n:aa pyódu.

Nmî kîghê cha yi lama dono mb:aamb:aa dpîm:o ya.

Chóó Lémi ngê apê, Pi cha y:oo a dny:e daa ny:ee ngópu. Apê, Yi lama a tóó, dono mb:aamb:aa. Apê, Yi yin:i u m:o ngm:a kwo, u pi, Pi daa pê pwopwo. Apê, Yi yin:i kîgha wa m:a ngmê, apê, wadpî ya. Apê, Daa wa pw:oo knî. U l:êê díy:o Chóó Lémi ngê ngm:ii kalê doo, my:âng:o vy:o. Yi maa nkoko ngê. Awêde pi maa daa t:a, wu yin:i dê yi km:ee. Nmî kîghê cha y:oo Eden a kuwo ngópu.

Kéén mbwémi Epel yi dan:êmbum

Adam cha tpamê knopwo, yi tp:ee mâ kaan:i u pi Kéén. U kuwó dini ghi ngê m:u tpyé ngópu, my:e mâ, u pi Epel. Dini ghi n:i:i ngê kaa knopwo, Kéén yâpwo têdê p:uu dpîm:o dpodo, Epel ngê tpile tp:oo w:uu yin:ê dpîm:o y:en:ê.

U kuwó dini ghi ngê Kéén ngê yâpwo têdê ntén:i knî ngmê núwo, Chóó Lémi ka mî y:ee too. Myénté Epel ngê tpile tp:oo mb:aamb:aa knî ngmê núwo, vya too, nk:êê too, Chóó Lémi ka y:ee too. Chóó Lémi ngê Epel u yi mb:aamb:aa ngê u ngw:o doo kwo, ngmên:ê Kéén u yi u ngw:o dêpwo kwo. Kéén u n:uw:o d:ud:umbiy:e dono ngê pyodo. Chóó Lémi ngê kwo, Lukwe díy:o chi n:od:e? Kwo, Kópu mb:aamb:aa w:ee d:uud:uu té, kwo, nyi a ng:a pê kwo.

Published 1980

Printed by the S.I.L. Printing Department
Ukarumpa, E.H.P., Papua New Guinea

National Library of Australia
Card Number and ISBN 0 86893 090 3